



17. august 2012

UKA 2012/30

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naalagaaffiit Peqatigiinni avatangiisit ineriartornerlu, UNCED, Rio de Janeiro-mi 1992-mi Agenda 21 aqutigalugu akuerineqartoq Piujuaannartitsineq tunngavigalugu ineriartortitsinissap Kalaallit Nunaannit malinneqarsimaneranik killiffilersuisussamik kiisalu Kalaallit Nunaanni piujuaannartitsineq tunngavigalugu ineriartortitsinerup qanoq siuarsarneqarsinnaaneranut siunnersuusiortussamik Pisorta qarfinnit assigiinngitsuneersunik inuttalimmik ataatsimiititaliamik Naalakkersuisut ulloq 1. januar 2013 aallarnerfigalugu sulilersussamik ataatsimiititalioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut

(Inatsisartunut ilaasortaq Andreas Uldum, Demokraatit)

Tunngavilersuut

Junip qaammataani kaalaallit aallartitaat Rio +20 ataatsimeersuarnermi Brasiliami ingerlanneqartumi peqataapput. Ataatsimeersuarnermut atsiunneqartumi pineqarpoq Naalagaaffiit Peqatigiit avatangiisit ineriartornerlu pillugit ataatsimeersuarmata, UNCED-mi, Rio de Janeiromi, sananeqartoq isumaqatigiissut Agenda 21, 300-nik quppernilik pilersaarutaasorlu ukiut untritilikkaat 21-issaanni piujuaannartitsilluni ineriartortitsinissamut.

Taaguuk piujuaannartitsineq pingaarutilerujussuannornikuuvoq ukiullu 20-t kingulliit ingerlanerini sunniuteqarsimalluni.

Ineriartorneq nungukkiartuutaaneq ajorpoq, pisuussutinik atui piluttoqarsimatinnagu aamma ineriartornerup kinguaariit tullii pisuussutinik pineqartunik nunguunneqarsimanngikkaangata. Piujuaannartitsineq tassaavoq Kalaallit Nunaanni isumaqarluartoq, isertitatta amerlanersaat isertittaratsigit pisuussutigut uumassusillit atorlugit, piniapilunneqarpata aalisapilunneqarpataluunniit nungussinnaasut imaluunniit ima ikilitigisinnaasut aallaat inuussutigineqarsinnaajunnaarlutik.

Rio+20 ataatsimeersuarnermi ersarissarneqarpoq, nunarsuarmi tamarmik nunat tamarmik sapinngisannguartik tamakkerlugu qulakkeerniassagaat, nunani ataasiakkaani innuttaasut paasisimassagaat piujuaannartitsinerup sunnera aamma tassani tunngaviit tunngavigalugit sulisoqassasoq.

Qularutissaanngilaq piujuaannartitsinissaq anguniarlugu suliaq naalakkersuisuni aallartittussaammat tassungalu atatillugu Naalakkersuisut pilersaarusioreernikuupput, siunnersuutigineqartunit suleqatigiisitaniit tunngavigineqarsinnaasumik.

Suleqatigiisit misissuinermini/nalunaarusiamini siunnersuuteqassaq, qanoq sumilu piujuaannartitsineq innuttaasunut ilisaritinneqassanersoq. Demokratini isumarput naapertorlugu tunngaviit paasiuminarnersaat meeqqerivinni pinnguaatit assigiinngitsut atorlugit atorneqartariaqarput.

Nungukkiartuutaangitsumik ineriartorneq tamatumalu inuiaqatigiit ulluinnarni inuunerisut kiisalu nunarsuup sinneranut sunniutai meeqqat aturfiani aturtitsinermut ilaatinneqassapput kiisalu ilinniagaqalernissamut piginnaanngorsarfinni – ajornanngippat sukumiisumik itisuumillu sapaatip akunnikkaartumik eqqartortarlugit.

Tamatuma saniatigut pingaaruteqarpoq suleqatigiit suliarissammassuk qanoq iliorluni Namminersorlutik Oqartussat, kommunit inuussutissarsiortullu il.il. Agenda 21 aallaavigalugu sumiiffimmi aallartinneqartut aallaavigisassaneraat, sumiiffimmimi tunniusimanissaq piumasagaataammat Agenda 21 anguneqassappat, nunarsuarlu taamaalilluni nungukkiartuutaangitsumik ineriartulerluni.

Pisortanut aningaasatigut allaffissornikkullu kingunissai

Piffissaq qaninnerusoq eqqarsaatigalugu pisortanut aningaasatigut kingunissai killeqassapput. Suleqatigiisiat aningaasartuutaat Pisortaqaarfiup mannakkut missingersuutaasa iluani akilerneqartariaqarput. Piffissaq ungasinnerusoq eqqarsaatigalugu pisortat aningaasartuuteqartinneqarsinnaapput, aalajangerneqassappat suleqatigiisiat innersuussutaat aningaasartuutitallit malinneqassasut.

Namminersorlutik Inuutissarsiortunut aningaasatigut allaffissornikkullu kingunissai

Soqanngilaq piffissaq qaninnerusoq eqqarsaatigalugu. Piffissaq ungasinnerusoq eqqarsaatigalugu namminersorlutik inuutissarsiortunut aningaasartuutitaqarsinnaavoq, aalajangerneqassappat suleqatigiit innersuussutaat aningaasartuutitallit malinneqassasut.

Innuttaasunut aningaasatigut allaffissornikkullu kingunissai

Soqanngilaq